

**Unnuinermut akitsuut pillugu Inatsisartut inatsisissaattut siunnersuut**  
*Aningaasaqarnermut Akileraartarnermullu Naalakkersuisumit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Peter Olsen, Inuit Ataqatigiit, siulittaasoq  
Inatsisartunut ilaasortaq Pele Broberg, Naleraq, siulittaasup tullia  
Inatsisartunut ilaasortaq Mariane Paviassen Jensen, Inuit Ataqatigiit  
Inatsisartunut ilaasortaq Kristian Jeremiassen, Inuit Ataqatigiit  
Inatsisartunut ilaasortaq Kuno Fencker, Siumut  
Inatsisartunut ilaasortaq Karl Tobiassen, Siumut  
Inatsisartunut ilaasortaq Jens-Frederik Nielsen, Demokraatit

UKA 2024-mi ulloq 24. september siullermeerinninnerup kingorna ataatsimiititaliap sunnersuut misissorpaa

**1. Siunnersuutip imarisaa siunertaalu**

Inummut ataatsimut naatsorsuullugu unnuinermut ataatsimut 30 kr.-inik unnuinermut akitsuummik atuutilersitsinissaq inatsisissatut siunnersuummi pineqarpoq. Takornarianut unnuinermi akitsuut atuutissaaq, maanili najugalinnut atuunnani. Najukkami nunallu immikkoortuini takornariaqarnerup ineriartortinnissaanut kommunit periarfissaannik tapersersuinissaq akitsuusiinermi siunertaavoq. Ukiup ingerlanerani unnuinerit akitsuuserneqartussat amerlassusii malillugit akitsuummit iluanaarut kommunit akornanni agguataarneqassaaq. Akitsuummit isertitat kommunimit assersuutigalugu piffinni takornariat amerliartornerannik sunnerneqarsimasuni pinaveersaartitsiniutinik iliuuseqarnermut imaluunniit kommunimi takornariaqarnermik ineriartortitsinermik siuarsaataasumik iliuitsinut atorneqarsinnaapput.

**2. Siunnersuutip Inatsisartunit siullermeerneqarnera**

Siunnersuut siullermeerinninnermi partiinit amerlanerussuteqartunit taperserneqarpoq. Pissutsit arlallit siunnersuummik siullermeerinninnermi oqaatigineqartut annertunerusumik

suliarineqarnissaasa pisariaqartinneqarnerat oqaatigineqarpoq. Tamanna tunngavigalugu siunnersuut Aningaasaqarnermut Akileraartarnermullu Ataatsimiititaliamut suliarineqartussanngorlugu innersuunneqarpoq.

### 3. Tusarniaanermut akissutit

Siunnersuut piffissami 2024-mi 14. junimit 12. julimut tusarniaassutigineqartoq Naalakkersuisut paasissutissiissutigaat. Tusarniaanermut akissutit tiguneqartut tunngavigalugit Naalakkersuisut tusarniaanermut allakkiamik suliaqarput, taannalu inatsisissatut siunnersuummut ilanngussatut ilanngunneqarsimavoq.

### 4. Saaffiginnissutit

Siunnersuut pillugu Sulisitsisunit saaffiginnissummik ataatsimiititaliaq ulloq 3. oktober 2024-mi tigusaqarpoq. Saaffiginnissut isumaliutissiissummumut **ilanngussaq** 1-tut ilanngunneqarpoq.

### 5. Aningaasaqarnermut Akileraartarnermullu Naalakkersuisup ilisimatitsiffiusumik ataatsimeeqatigenera

Siunnersuutit ataatsimiititaliamut aammalu Naalakkersuisut suliassaqaarfiinut ataatsimut attuumassuteqartut pillugit Aningaasaqarnermut Akileraartarnermullu Naalakkersuisoq ataatsimiititaliamit ilisimatitsiffiusumik ataatsimeeqatigineqarpoq. Siunnersuutit taakku ilusiligaanerannik saqqummiussinermi siunnersuut matumani pineqartoq ilaavoq.

### 6. Naalakkersuisunut apeqqutit

Ataatsimiititaliap siunnersuummik suliarinninneranut atugassatut apeqqutit arlallit akissuteqarfigeqqullugit ataatsimiititaliap Aningaasaqarnermut Akileraartarnermullu Naalakkersuisoq qinnuigaa. Ataatsimiititaliap apeqqutaasa akissutillu assilinerat isumaliutissiissummumut matumunnga **ilanngussatut 2-tut** ilanngunneqarput.

### 7. Ataatsimiititaliap siunnersuummik suliarinninnera

Siunnersuutip imarisai pillugit oqaaseqaateqartoqaraluartoq siunnersuummik siullermeerinninnermi siunnersuut tapersorsorluarneqartoq ataatsimiititaliamit oqaatigineqassaaq. Taamaattumillu pissutsit annertunerusumik suliarineqartussatut pisariaqartinneqartutut oqaatigineqartut matuma kinguliani ataatsimiititaliamit erseqqissaavigineqassapput.

#### 7.1 Ilaatinneqanngitsut

Akitsuutip atuutilernissaanut siunnersuummi minnerpaaffiliineq apeqquserneqartoq ataatsimiititaliamit maluginiarneqarpoq, taanna malillugu akitsuut qaammatini pingasuni unnuinernik 20-nik naleqartumik 599 kr.-init annertuneruppat unnuisitsisartup unnuinermut akitsuummik aatsaat akiliisassalluni. Tassunga atatillugu atuutsitsinnginneq tamanna qanoq akeqassanersoq, tamanna unnuinernut qassinut atuunnersoq kiisalu aaqqissuussineq taanna

Naalakkersuisunit qanoq nakkutillivigineqalersaarnersoq paasissutissiissutigineqassasoq ataatsimiititaliamit kissaatigineqarpoq.

Taamatuttaaq umiarsuarni, assersuutigalugu umiarsuarni takornariartaatini tingerlaatersortunilu unnuinerit inatsissatut siunnersuummi akitsuusiinnermut ilaatinneqanngitsut ataatsimiititaliamit maluginiarneqarpoq. Taamatut ilaatitsinnginnermut tunuliaqutaasup itisilerlugu Naalakkersuisunit nassuiaatigineqarnissaa ataatsimiititaliamit kissaatigineqarpoq.

Kiisalu Naalakkersuisut siunnersuut tusarniaanermut akissutit malillugit naleqqussarsimagaat ataatsimiititaliamit maluginiarneqarpoq, taamaalillunilu maani najugallit unnuinnermut akitsuummumut ilaatinneqassanatik. Tamanna naapertuuttut ataatsimiititaliamit isigineqarpoq, assersuutigaluguli nunani allani kalaallit ilinniartut kalaallilluunniit aallartitaqarfiini aallartitat maani najugalittut Naalakkersuisunit isigineqarnersut paasinarsisinneqassasoq kissaatigineqarpoq.

## 7.2 Akitsuutip annertussusissaa

Akitsuutip annertussusissaa pillugu isummat assigiinngitsut siullermeerinninnermi saqqummiunneqarput. Ataatsimiititaliap suliamik suliarinninnera apeqqutaatillugu akitsuutip annertussusissaata naleqqussaqqinneqarnissaanut periarfissaq Aningaasaqarnermut Akileraartarnermullu Naalakkersuisup naggasiilluni oqaaseqarnermini oqaatigigaa ataatsimiititaliamit tassunga atatillugu maluginiarneqarpoq.

Akitsuutip annertussusissaata procentikkaartumik aalajangersarneqarsinnaaneranut periarfissaq ilaatigut oqaluuserineqarpoq. Tamatuma saniatigut aningaasat naleerukkiartornerat assigalugu akitsuutip annertussusiata ingerlaavartumik naleqqussarneqartarnissaata pingaaruteqarnera oqaluuserineqarpoq. Kiisalu akitsuutip annertussusissaa oqimaatigiissaariffigineqassasoq oqaluuserineqarpoq, tamatumani akitsuut isertitsissutaasassalluni tamatumalu peqatigisaanik takornariat Kalaallit Nunaannut angalarusukkunnaarnerannik nassataqassanani.

## 7.3 Siunnersuutip piviusunngortinneqarnerani aningaasaqarnikkut allaffissornikkullu kingunerisassat

Aningaasaqarnikkut allaffissornikkullu kingunerisassat siunnersuummut nalinginnaasumik nassuiaatini allassimasut naammattumik annertussuseqartumik nassuiaatigineqarnersut siunnersuutip siullermeerneqarnerani apeqquserneqarpoq. Kommunit allaffissornikkut annertunerusumik artukkerneqaqinnginnissaat, akitsuutilli nakkutigineqarnera aningaasaqarnikkut allaffissornikkullu killiliussat siunnersuummi allassimasut iluanni akilerneqarsinnaanissaat ataatsimiititaliamit pingaartinneqarpoq.

Allakkatigut akineqarnissaq siunertaralugu pissutsit siuliani taaneqartut pillugit ataatsimiititaliaq Naalakkersuisunut apeqquteqarpoq. Kiisalu Sulisitsisut allakkatigut

saaffiginnissutaannut Naalakkersuisut oqaaseqaateqarnissaat ataatsimiititaliamit kissaatigineqarsimavoq. Tassunga atatillugu ataatsimiititaliap apeqqutai Naalakkersuisullu akissutaat innersuussutigineqarput (ilanngussaq 2).

#### **8. Siunnersuutip aningaasaqarnikkut kingunerisassai**

Siunnersuutip piviusunngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini allaaserineqarput. Tamatumunnga ataatsimiititaliap oqaaseqaatai immikkoortoq 7-mi itisilerneqarput.

#### **9. Ataatsimiititaliap inassuteqaatai**

Ataatsimiititaliami amerlanerussuteqartut Inuit Ataqtigiinneersut Siumumeersullu siunnersuut **akuerineqassasoq** inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Peter Olsen  
Siulittaasoq

---

Pele Broberg  
Siulittaasup tullia

---

Karl Tobiassen

---

Mariane Paviassen Jensen

---

Kuno Fencker

---

Kristian Jeremiassen

---

Jens-Frederik Nielsen